

PAWL IH CAPAT 2 FILEMON

Filemon loe kricaa maeto ah oh moe, tamna tawnkung ah oh. Onesima loe Filemon ih tamna ah oh, toe anih loe Kolossa vangpui ah kaom, angmah ih angraeng, Filemon khae hoiah cawnh ving. To tiah a cawnh ving naah Pawl hoi Rom vangpui ah angqum hoi. Pawl mah patukhah rang hoiah Onesimus loe kricaa ah oh. Hae ca loe Pawl mah angmah ih ampui Filemon khaeah tarik ih ca ah oh; Onesima loe kricaa ah oh boeh pongah, anih to tamna ah talawk ai ah, kricaa nawkamyia maeto baktiah talawk let hanah tahmen hnikhah ca to tarik pae. Pawl ih ampui Tychicus mah Onesima to caeh haih moe, Filemon khaeah ca to paek (Col. 4.7-9). Filemon capat mah, long nui hmuen hoi angkom pongah loe Kri hoi angkom to lokpui kue, tiah thuih koehhah ih ni. Hae capat loe Pawl mah A.D 60 nathuem ah tarik mue, tiah poekhah tawnh o.

¹ Kri Jesu pongah thongim krah, Pawl hoi aicae amnawk Timote mah, a palung o ih, tok nawnto sah ampui Filemon,

² a palung o ih tanuh Apphia, aicae hoi misa nawnto tuh Arkhipa hoi na im ah amkhueng kricaanawk khaeah ca tarik:

³ Angraeng Jesu Kri hoi aicae Ampa Sithaw khae hoi ih tahmenhahih hoi monghahih to nang-cae khaeah om nasoe.

Kawnhahih lawkthuihahih

⁴⁻⁵ Angraeng, Jesu tanghahih na tawnh moe, kaciim kaminawk boih to na palung ti, tiah ka thaih naah, ka Sithaw khaeah kawnhahih lawk ka thuih toepsoep;

⁶ Jesu Kri ah na tawnh ih kahoih hmuennawk boih na panoekhahih rang hoiah, minawk khaeah tanghahih kawng na thuih naah caak o thai tangtang hanah lawk ka thuih.

⁷ Kam nawk, kaciim kaminawk ih palungthin to nang thasak let pongah, to baktih nam lung-hahih mah kaicae han thuilaek ai anghoehahih to ang paek.

Onesima han tahmen hnikhahih

⁸ To pongah ni Kri ah misa ka hoih parai moe, na sak han koi kahoih hmuen to sak hanah, lok kang thuih thaih,

⁹ toe saning kacoeh, Jesu Kri ih thongkrah kami ah kaom kai Pawl mah, amlunghahih hoiah ni tahmenhahih kang hnik.

¹⁰ Thongim krak nathung ka capa ah sak ih, Onesima hanah tahmenhahih kang hnik pae:

¹¹ anih loe canghniah nang han avanghahih om ai, toe vaihi loe nang hoi kai hanah atho kaom kami ah oh boeh.

¹² Anih to nang khaeah kang patoeh let: anih to kai thung hoi tacawt kami baktih toengah talawk ah:

13 kahoih tamthanglok ka thuih pongah thongim ka krak naah kai khetzawn hanah, nang zuengah anih to kaimah khaeah ohsak han ka koeh:

14 toe nang bomhah loe tha hoiah saksak nganga ih baktiah om ai ah, na sak koehhah palungthin hoiah saksak han ih ni kang koeh hah, to pongah nang naakrakhah om ai ah loe tidoeh sak han ka koeh ai.

15 Anih hoi nawnto dungzan ah na oh han ih kalang mue, anih mah nawnetta thung ang cawnhtaak.

16 Toe anih loe vaihi tamna ah om ai boeh, tamna pongah sang boeh, kai hanah loe palung ih kam nawk baktiah ni oh, nang han cae loe taksa hoi Angraeng ah kawkruk maw palung ih amnawk baktiah om aep tih?

17 Kai hae toksah ampui ah na poek nahaeloe, anih doeh kai baktih toengah talawk ah.

18 Nang khaeah hmuen sakpazaehah maw, pathok han koi laiba maw om nahaeloe, kai taham ah suem ah.

19 Kai, Pawl mah kaimah ih ban hoi roe ca kang tarik: toe kaimah kang rong pae han, na hinghah ah kai khae laiba na tawnh, tiah kang thuih han angai ai.

20 Ue, kam nawk, Angraeng ah anghoehah na paek ah: Angraeng ah kai ih palungthin to anghasak ah.

21 Ka lok nang tahngai pae tih, tiah oephah ka tawnh, to khue ai kang hnik ih hmuen pongah doeh kapop kueah na sah tih, tiah panoekhah hoiah ni ca kang tarik.

²² Toe pacoengah, ka toemh han ih ahmuen to paroep coek ah: lawk na thuih o haih rang hoiah nangcae khaeah kang zo thai tih, tiah ka poek.

²³ Kri Jesu ah kai hoi nawnto thongim krah Epaphra mah ban ang sin o;

²⁴ tok nawnto sah kami Marka, Aristarka, Dema hoi Luka cae mah doeh ban ang sin o.

²⁵ Aicae Angraeng Jesu Kri tahmenhah loe nangcae ih muithla hoi nawnto om nasoe.

1.23 Kol 1.7; 4.12. **1.24** Tsk 12.12,25; 13.13; 15.37-39; Kol 4.10; Tsk 19.29; 27.2; Kol 4.10; Kol 4.14; 2Ti 4.10; Kol 4.14; 2Ti 4.11.

Asang Khongca Bible (2019)
The Holy Bible in the Asang Khongca language of
Mynmar

Public Domain

Language: Asang Khongca (Chin, Eastern Khumi)

Dialect: Asaang Khongca

Published in Mynmar, which is not a signatory to international copyright treaties. Copyright may apply locally in Mynmar. Translator names withheld for security reasons.

2020-09-24

PDF generated using Haiola and XeLaTeX on 18 Apr 2025 from source files dated 13 Dec 2023

48776925-bad5-5701-8cb9-5ee5267a8fab